

AD LECTOREM.

S. P. *Lector benevole.*

EXcurrit quadrimestre, quo consultus à Bibliopola, quodnam scriptum pro tempore prælo judicarem dignius; commendaverim Opera Josephi Quercetani Galli, Medici olim Regij, collectim edenda scil. quæ hæc teneus frustulatim prodierint. Consuluit idem Virum nobilissimum Dn. MAXIMILIANUM JUNGEM in Imperiali hac Repub. Senatorem ac Scabinatus Assessorem, Virum (absint blanditiæ) in omni scibili oculatissimū, bibliothecā librorum etiā rarissimorum locupletissimum, literarum promotorem officiosissimum adeoq; Scholarcham Gymnasii nostratis meritissimum. Hic approbavit consilium, modo ipsemet qui dederim consilium operi afferrem auxilium.

Monitis his Bibliopola gratificatur scripta penitus intui sum, reperitq; multa inibi occurrere obscura, multa superflua, multa ab arte medica heterogenea, nec pauca cōfusa, locisq; peregrinis inserta. Horū emendatio cū omnimodam scriptorum transpositionem rerumque ad coordinationem requisitarum additionem, adeoque laborem tædiosissimum requireret: horruī primum, temporis perpendens brevitatem (præfixæ enim editioni fuerunt nūdina hæc vernaes) labori minimè respondentem, præcipuè cum praxi ægrotis debita, diurnum præripiat. Verum enim vero prævaluerunt tandem tanti illius viri autoritas, desiderium promovendi studium medicum, nec non stimulus hinc inde à viris doctissimis superadditus, inter quos non ultimi fuerunt Vir clarissimus STEPHANUS CAHAGNESTUS Academia Cado-mensis Professor Medicinæ celeberrimus; ut & acutissimus atq; in Philosophia Hermetica exercitatissimus D.D. SAMUEL CLOSSÆUS, Physicus Mediomatricibus famosissimus, &c. Adii itaq; opus, praxi quātum licuit succidi, lucubrationesque nocturnas impendi, tantumque Dei auxilio feci, ut scripta Quercetani quæ lucem viderunt, certa methodo coordinata, amputatis superfluis ac heterogeneis; collectis confusis; illustratis obscuris; additisque necessariis aliisque scitu dignis, tecum, benevole lector communice, quod quanto labore præstitum sit, tibi met pristina cum hisce conferenti relinquo judicandum.

Sunt autem scripta illa: Pharmacopœa Dogmatica restituta; Diæteticon polyhistoricum: Tractat. de Priscorum medicina cum consiliis: Tetras morborum capitis: Pestis alexicacus: Defensio medicinæ Hermeticæ: Respon-sio ad Aubertum; Incurso ad excursum Riolani: Spagyrica medicamentorum præparatio: Sclopetarius cum Antidotario Spagyrico. Hæc sunt quæ digessimus; Reliqua enim, ad quæ lector nonnullibi author remittit, in lucē nondum

nondum prodierunt. Sed restant Lector de quibus te commonere oportet. Primum est, quod res eadem diversimode tractata nonnunquam occurrant id quod factum scias, ut eadem, siquidem à vulgari via quadantenus recedunt, eò dilucidius innotescant. Secundum est, quod in nonnullis ab opinione authoris discedam, nixus scilicet rerum analogiâ. Hanc tamen discrepantiâ, facili negotio conciliare poteris sin minus, elige probabilius. Nec enim mea vendito ac si errare nequeam: homo sum, humani nihil à me alienum puto; ipsemet si meliora doctus fuero, cedere non recuso. Tertium est quod correcturâ adesse non vacaverit, tempus enim quod praxi subtrahere licuit, opus elaborandum sibi sumpsit. Hinc factum, ut contra voluntatem correcturâ incuriosa ac peregrinâ plurima irreperint errata, quæ tamen excerpere tempus curtum prohibuit. Annitar tamen, Deo volente, ut quæ sensui derogare potissunt, nundinis futuris compos esse possis. Reliqua enim quæ facile conspicua sunt, ipsemet corrigas. Scribimus enim tyronibus quidem Medicinæ, non linguæ latinæ. His vale. Et si qua incongruè tractata occurrerint, boni consule, temporis brevitati adscribe, atque data occasione politiora expecta.

J. S. D.



SYN